



НҰПАҚАНЫ НЕГЕ  
СЫРТТАН ІЗДЕДІ?

5-БЕТ | МӘСЕЛЕ



ДОНОР ӨМІРДІ  
ҰЗАРТАДЫ

7-БЕТ | ДЕНСАУЛЫҚ



Қасым-Жомарт ТОҚАЕВ, ҚАЗАҚСТАН РЕСПУБЛИКАСЫНЫҢ ПРЕЗИДЕНТІ:

МЕН ӨТКЕН ҚЫРКҮЙЕКТЕГІ ЖОЛДАУЫМДА ЖАҢА ЭКОНОМИКАЛЫҚ ҮЛГІГЕ КӨШЕТІНІМІЗДІ АЙТТЫМ, 2029 ЖЫЛҒА ҚАРАЙ ЖАЛПЫ ІШКІ ӨНІМДІ ҚАЗІРГІДЕН ЕКІ ЕСЕГЕ АРТТЫРУ МӘСЕЛЕСІН БАСТЫ СТРАТЕГИЯЛЫҚ МАҚСАТ РЕТІНДЕ БЕЛГІЛЕДІМ. КӨП ҰЗАМАЙ ҮКІМЕТТІҢ КЕҢЕЙТІЛГЕН ОТЫРЫСЫ ӨТЕДІ. ОНДА ЕЛІМІЗДІҢ БЫЛТЫРҒЫ ӘЛЕУМЕТТІК-ЭКОНОМИКАЛЫҚ ДАМУ ҚОРЫТЫНДЫСЫ ШЫҒАРЫЛЫП, АЛДАҒЫ ЖҰМЫСТЫҢ АМАЛ-ТӘСІЛДЕРІ АЙҚЫНДАЛАДЫ.

№6  
(4594)

Сейсенбі  
16 қаңтар  
2024 жыл



# ASTANA



РЕСПУБЛИКАЛЫҚ ҚОҒАМДЫҚ-САЯСИ ГАЗЕТ

А Қ Ш А М Ы

1990 ЖЫЛҒЫ 13 ҚАЗАННАН БАСТАП ШЫҒАДЫ



Мемлекет басшысы Қасым-Жомарт Тоқаев ел тарихында ерекше орны бар тұлғаларға құрмет көрсету дәстүрі еліміздің жалпыұлттық бірегейлігін нығайта түсуге зор септігін тигізетінін айрықша атап өтті. Биыл 100 жылдығы аталып өтілетін Халық қаһармандары Сағдат Нұрмағамбетов пен Рақымжан Қошқарбаев та құрметті тұлғалар қатарынан саналады. Бүгінгі таңда республика бойынша қос батырдың құрметіне арналған шаралар басталып кетті.

3

## ҚҰРМЕТ ТҰҒЫРЫНДА — ҚАҒАРМАНДАР



### ҚАНДАСТАР КВОТАСЫ КӨБЕЙДІ

Қазақстанға шетелдерден көшіп келетін қандастар мен ішкі қоныс аударушыларды қабылдауға арналған 2024 жылғы өңірлік квота бекітілді.

Еңбек және халықты әлеуметтік қорғау министрінің бұйрығымен қандастар мен қоныс аударушыларды қабылдауға арналған 2024 жылғы өңірлік квотасы 9 483 адам деп белгіленді. Бұл 2023 жылмен салыстырғанда 554 адамға артық.

«Бұйрықтың мақсаты – Үкімет айқындайтын өңірлерде қандастар мен ішкі қоныс аударушыларды оңтайлы қоныстандыру. 2024 жылы өңірлік квота облыстар бойынша қандастарға Павлодар облысы – 902, Қостанай облысы – 550, Ақмола облысы – 285,

Шығыс Қазақстан облысы – 269, Солтүстік Қазақстан облысы – 207, Абай облысы 220 адамға, ал ішкі қоныс аударушыларға Солтүстік Қазақстан облысы – 2 702, Павлодар облысы – 2 603, Қостанай облысы – 950, Шығыс Қазақстан облысы – 372, Абай облысы – 255, Ұлытау облысы – 132, Қарағанды облысы 36 адамға беріледі» делінген министрлік хабарламасында.

Бұған қоса, қандастар мен қоныс аударушыларды қабылдауға арналған өңірлік квота алатын адамдарға мемлекеттік қолдау шаралары көрсетіледі.


### ОЛИМПИАДАҒА АТТАНДЫ

Астанада 19 қаңтар-1 ақпан аралығында Оңтүстік Кореяда өтетін IV қысқы жасөспірімдер Олимпиадасына қазақстандық спортшыларды шығарып салу рәсімі өтті.

14-17 жас аралығындағы жасөспірімдер арасында өтетін байрақты бәсекеге әлемнің 70 елінен спортшылар қатысып, 7 спорт түрінің 15 бағдарламасы бойынша 81 медаль алтын жүлдені сарапқа салады. Туризм және спорт министрі Ермек Маржықпаев шорт-тректен ел чемпионы Ерасыл Шыңғысхан мен конькимен жүгіру

спортынан ел біріншілігінің жеңімпазы Кристина Шумаковаға Олимпиаданың ашылу салтанатында көтеріп шығатын Қазақстан туын табыс етті.

Жасөспірімдер Олимпиадасында Қазақстанның жасөспірімдер спортшылары спорттың 5 түрінен бақ сынап, 55 медаль жиынтығына таласады.



«Қазгидромет» 16-18 қаңтар аралығында еліміздің басым бөлігінде аязды ауа райы болатынын болжайды.

Синоптиктер еліміздің батысы мен оңтүстік-шығысында ғана тұрақсыз ауа райы күтілетінін, жауын-шашын қар түрінде жауып, жел мен бұрқасын күшейетінін атайды.

Негізгі температура фоны солтүстікте, шығыста және орталықта түнде 25-33, күндіз 15-23 градус аяз тұрақтайтынын мәлім етіледі.

Астана қаласының ТЖ және ІД қала тұрғындарын аязды-боранды күндері сақтық шараларын сақтауға шақырады.



«Ашық НҚА» порталында «Назарбаев Зияткерлік мектептері» дербес білім беру ұйымында оқудың төлемақысы қымбаттайтыны жарияланды.

Президенттің «Өркен» білім беру грантын тағайындау қағидалары мен мөлшерлерін бекіту туралы» Оқу-ағарту ведомствосының бұйрығына өзгеріс енгізетін бұйрық жобасы жарияланды.

«Гранттың мөлшерлері: жатақханада тұруды есептегенде, күнтізбелік жылға 2 349 191 (екі миллион үш жүз қырық тоғыз мың жүз тоқсан бір) теңге; жатақханада тұруды есептегенде, күнтізбелік жылға 3 247 305 (үш миллион екі жүз қырық жеті мың үш жүз бес) теңгені құрайды» делінген аталған бұйрық жобасында.

Бұйрық жобасы 29 қаңтарға дейін қоғамдық талқылауда болады.

ВАЛЮТА  
БАҒАМДАРЫ

€ EUR/KZT 494.75 \$ USD/KZT 451.33 ₪ RUB/KZT 5.12 ¥ CNY/KZT 62.99

t.me/elordainfo

www.astana-akshamy.kz

## ДАНИЯ КОРОЛІН ҚҰТТЫҚТАДЫ

Президент Қасым-Жомарт Тоқаев Данияның жаңадан таққа отырған Королі Х Фредерикті құттықтап, жеделхат жолдады.

«Сіздің басшылығыңызбен Дания өзінің орнықты дамуын, халқының әл-ауқатын еселеп, халықаралық аренадағы беделін арттыру жолындағы игі істерді жалғастыра беретініне кәміл сенемін. Қазақстан мен Дания арасындағы достық пен өзара қолдауға негізделген

жан-жақты ынтымақтастық бірлескен күш-жігеріміздің арқасында алдағы уақытта да нығая түсетініне үмітім зор» деп жазылған жеделхатта.

Сонымен қатар Мемлекет басшысы Патшайым лауазымынан мерзімінен бұрын өз еркімен кетіп, тақ мұрагері

Фредерик ханзаданы Дания Королі ретінде жариялаған II Маргретеге де жеделхат жолдады. Президент Қазақстан мен Дания арасындағы ынтымақтастықты дамытуға сүбелі үлес қосқаны үшін II Маргретеге ризашылығын білдірді.

Мемлекет басшысы Қасым-Жомарт Тоқаев 18-19 қаңтар күндері Италия және Ватикан мемлекеттеріне ресми сапармен барады.

## РЕСМИ САПАРМЕН БАРАДЫ

Бұл туралы Ақорданың телеграм-арнасы ақпарат таратты. Президент Рим қаласында Италия президенті Серджо Маттарелламен, Премьер-ми-

нистр Джорджа Мелонимен келіссөздер жүргізеді. Сондай-ақ 19 қаңтарда Ватиканда Рим Паласы Францискпен кездеседі. Бұдан бөлек, Мемлекет

басшысы БҰҰ Азық-түлік және ауыл шаруашылығы ұйымының (FAO) және Дүниежүзілік азық-түлік бағдарламасының (WFP) штаб-пәтерлеріне барады.

## ЕСКЕРТКІШ ОРНАТЫЛАДЫ

Биыл Мемлекет және қоғам қайраткері Заманбек Нұрқаділовтің туғанына 80 жыл толды. Осыған орай Алматы қаласында марқұмның рухына ас берілді. Асқа жиылған жұрт мемлекетшіл қайраткердің елге сіңірген ерен еңбегін, қоғамды дамытуға қосқан зор үлесін атап айтты. Аста Президент кеңесшісі – Баспасөз хатшысы Берік Уәли Мемлекет басшысы Қасым-Жомарт Тоқаевтың хатын оқыды.

«Биыл белгілі мемлекет және қоғам қайраткері Заманбек Нұрқаділовтің туғанына 80 жыл толды. Тәуелсіз Қазақстан тарихында ел мүддесі үшін аянбай еңбек еткен азаматтар аз емес. Заманбек Қалабайұлы – осындай тұғырлы тұлғалардың бірі. Ол егемендіктің алғашқы

кезеңінде көптеген жауапты қызметті абыроймен атқарды. Мемлекетімізді нығайтуға айрықша атсалысып, өңірлерді өркендетуге зор үлес қосқаны даусыз. Ұлт перзенттерінің есімін ел жадында жаңғыртып, еңбегіне лайықты баға беру – ұрпақ парызы. Осы орайда, Зәкеңнің туған жері – Алматы

облысының Кеген ауданында оған ескерткіш орнату және Алматыдағы тұрған үйінде ескерткіш-тақта ашу қажет деп санаймын. «Тарих – таразы» деп бекер айтылмаған. Халқымыздың кесек тұлғалы азаматының елге сіңірген еңбегі ешқашан ұмытылмайды» делінген Президенттің хатында.



## ҚОСЫМША СТАНЦИЯЛАР САЛЫНАДЫ

Қаланы алдағы уақытта жылумен және ауызсумен қамтамасыз ету үшін жұмыс істеп тұрған нысандардың қуатын арттыру және жаңа нысандар салу бағытында жүйелі жұмыс жүргізіледі. Жақында инфрақұрылымдық нысандарды аралап, жұмыс барысымен танысқан Астана әкімі Жеңіс Қасымбек осындай мәлімдеме жасады.

«Қаланы жылумен және сумен қамтамасыз ететін инфрақұрылым нысандарының жұмыс барысымен таныстым. Олардың қатарында №2, 3 жылу-электр орталықтары (ЖЭО), №3 ауызсу сору-сүзу станциясы, «Тұран» және «Оңтүстік-Шығыс» газ-жылу станциялары бар. Өткен жылдың күзінде біз «Оңтүстік-Шығыс» газ жылу станциясын, «Тұран» газ жылу станциясының бірінші кезеңін, құрылысы ұзаққа созылған №3 жылу-электр орталығын салып бітіріп, іске қосқанымызды жақсы білесіздер. Бұл нысандар қалаға 1100 сағ/

Гкал-дан астам жылу беруге жол ашып, бізге жылыту маусымында профицитке шығуға мүмкіндік береді» деп жазды қала басшысы әлеуметтік желідегі парақшасында.

Бұдан бөлек, Жеңіс Қасымбек өткен жылдың жазында Астана су қоймасынан қалаға су құбыры тартылып, №3 ауызсу сору-сүзу станциясы салынғанын тілге тиек етті. «Жоғарыда аталған нысандардың бәрі штаттық режимде жұмыс істейді. Қаланы алдағы уақытта жылумен және ауызсумен қамтамасыз ету үшін жұмыс істеп тұрған нысандардың қуатын арттыру

және жаңа нысандар салу бағытында жүйелі жұмыс жүргізіледі. Мәселен, биыл тағы бір «Тельман» газ жылу станциясын (1-кезек), «Тұран» газ-жылу станциясының екінші кезегін саламыз. Олар қалаға тағы 850 Гкал/сағ жылу қуатын береді. Елорданы келешекте ауызсумен толықтай қамтамасыз ету үшін қазір су құбырының екінші желісін салу жұмысы жүргізіліп жатыр. Нұра жерасты су көзінен су құбырын жобалау және Тельман сорғы станциясын кеңейтуді жобалау жұмысы аяқталып келеді» деп жазды қала әкімі.



## ҮРКЕРДЕГІ МЕКТЕП ТАМЫЗДА АШЫЛАДЫ

Биыл тамыз айында Үркер тұрғын алабындағы Е639 және №201 көшелерінің қиылысында 900 орындық орта мектептің құрылысы аяқталады. 1 қыркүйектен бастап балалар жаңа еңселі мектепте оқиды. Бұл туралы Астана қалалық мәслихатының төрағасы Ерлан Каналимов мәлім етті.

«Есіл және «Нұра» аудандарының тұрғын алаптарының жағдайын жақсарту жөніндегі кешенді жоспар – іс-шаралар жобасын талқылауды жалғастырамыз. Есіл ауданында өткен жылы 144 жарықдиодты шамдар ауыстырылды, 80 көшеге шамдар орнатылды. 300 ағаш көшеті отырғызылды. «Нұра» ауданында 110 жаңа контейнерлік алаң орнатылып, 115 қолданыстағы алаңға жөн-

деу жұмыстары жүргізілді. Үркер тұрғын алабында интернеттің талшықты-оптикалық желілері салынууда, ұзындығы 108 шақырым магистральдық желілер төселді (1300-ден астам абонент қосылды). Аудан әкімдігіне «Нұра-Есіл» су арнасының жағалауына қоршау орнатуды, жаңадан салынған көпқабатты тұрғын үй кешендерін орталық жылу мен электр қуаты желісіне

қосуды тапсырдым. Сонымен қатар, кері байланыс орнату үшін тұрғындармен ақпараттық жұмысқа ерекше назар аударуды, сондай-ақ азаматтардың жеделдігі төмен санаты үшін пандустар мен басқа да арнайы құрылғыларды ауыстыру немесе орнату талап етілетін үйлер мен әлеуметтік нысандарға талдау жүргізуді ұсындым» деп жазды Е.Каналимов әлеуметтік желідегі парақшасында.

## 326 ЛОТО КЛУБ ЖАБЫЛДЫ

Ішкі істер министрлігі Ұлттық қауіпсіздік комитетімен бірлесіп, Бас прокуратураның үйлестіруімен лотерея клубтарының атымен жұмыс істейтін заңсыз онлайн-казинолардың ірі желісін жойды.

Ең ауқымды арнайы операцияға ІІМ мен ҰҚК-нің 3 мыңнан астам қызметкері жұмылдырылды. Операция барысында полицияға 400-

ден астам адам жеткізілді. Республика бойынша лото клубтарға 570 тінту жүргізілді. 23 бірлік атыс және травматикалық қару, 247

млн теңге, 55 млн ресей рублі, 125 мың АҚШ доллары, компьютерлік техника, мобильді құрылғылар тәркіленді.

### ЕЛЕҢ ЕТКІЗЕР

Оңтүстік Кореяның парламенті иттің етін жеуге тыйым салатын заң жобасын мақұлдады.

Заңды бұзғандар үш жылға сотталады немесе 23 мың АҚШ доллары көлемінде айыппұл төлейді. Ит өсірушілер мен мейрамхана иелеріне үш жыл мерзім беріліп отыр. Олар осы уақыт ішінде бизнесін тоқтатады не болмаса басқа бағытқа өзгертеді. Статистикаға сәйкес, 2023 жылы Оңтүстік Кореяда ит етін ұсынатын 1600-ге жуық мейрамхана мен 1150 ит фермасы болды.



2024 жылы 76 мемлекетте тұратын 4,2 миллиардтан астам адамның өмірі өзгеруі мүмкін.

Бұған президент және парламент сайлаулары әсер етеді. Алайда EIU Democracy Index сайтының талдауына, тек 43 елде ғана халыққа толыққанды демократиялық таңдауды ұсына алады. Бұл ретте, Еуропалық одаққа кіретін 28 елді айрықша атау керек. Бұдан бөлек, 2024 жылы халқының саны жөнінен жаһандағы ең ірі мемлекеттері – Үндістан, АҚШ, Индонезия, Бразилия, Ресей және Мексикада сайлау өтеді.



Парижде туристік салық 200 пайызға өсті.

Биыл Парижде қонақ үй немесе басқа орында тұрғаны үшін төлейтін салық көлемі өсті. Мәселен, қамал немесе сарайға тоқтағандар бір түн үшін 15 еуро 95 цент төлейді. Бұл – 7 мың теңгеден асатын сома. Бесжұлдызды қонақ үйдегі салық – 10, төртжұлдызды мейманханада – 8 еуро. Францияның Туризм агенттігі салық көлемін көтеруді Олимпиадаға дайындықпен байланыстырады. Парижге туристер қазірден ағылып жатқанға ұқсайды.

## ҚҰРМЕТ ТҰҒЫРЫНДА – ҚАҺАРМАНДАР

Астана қаласындағы № 68665 құрлықтық әскери бөлімінің әскери қызметшілері Кеңес Одағының Батыры, Халық Қаһарманы, тәуелсіз Қазақстанның тұңғыш Қорғаныс министрі Сағадат Нұрмағамбетов пен Рейхстагқа ту тіккен Халық Қаһарманы Рақымжан Қошқарбаевтың 100 жылдық мерейтойына орайластырылған акция өткізді.



– Биыл Ұлы Отан соғысы батырларының жүз жылдық мерейтойы атап өтілуде. Эстафетаны Ақтау теңіз жаяу әскерінен алып, челленджді қазақ халқының даңқты ұлдарына арнадық. Әскери қызметшілер толық жауынгерлік киіммен мәжбүрлі марш жасады. Әрбір жауынгердің техникасының салмағы шамамен 20 кг болды. Бұл тапсырманы күрделендірді, бірақ олар оны абыроймен атқарды, – деді № 68665 әскери бөлімінің командирі, подполковник Абай Әлібеков.

«Дені саудың – жаны сау» ұранымен өткен іс-шараны әскери қызметкерлер колоннасын бригада командирі мен оның орынбасарлары басқарды. Кедір-бұдырлы жерде 24 шақырым қашықтыққа жарыс әскери бөлімнің аумағына жақын жерде өтті. Компаниялардың бірі шаңғымен мәжбүрлі марш жасады. Іс-шараға барлығы 500-ге жуық әскери қызметкер қатысты.

Елордалық № 68665 әскери бөлімінің әскери қызметшілері Тараз гарнизонының механикаландырылған бригадасына челленджді тапсырды.

Кинологиялық қызмет көрсету орталығының полицейлері балаларға тақырыптық лекция ұйымдастырып, иттердің арнайы дайындықтан өтіп, кинологтардың бұйрығын қалай орындайтынын көрсетті.

## КИНОЛОГИЯЛЫҚ ОРТАЛЫҚТЫ КӨРСЕТТІ



Итті қалай ұсталатынын және қай түрі қызмет ететінімен таныстырды. Балалар қойылымды қызығушылықпен қарап, қойылымнан кейін кинолог қызметі туралы сұрады.

Полицияның кинологиялық

қызметіне бару балаларға кинологиялық қызмет пен олардың төрт аяқты көмекшісін білуге және түсінуге көмектесті.

Мұндай іс-шаралар балалардың полиция мамандығына деген құрметін қалыптастырады.

## ҚАР ТАЗАЛАУ ҚАРҚЫНДЫ ЖҮРГІЗІЛУДЕ

Соңғы бірнеше күнде елордада толассыз қар жауды. Соған сай, қаланың коммуналдық қызметі тәулік бойы күшейтілген режимде жұмыс істеуде.



Қар тазалау жұмысына 2500-ден астам жұмысшы мен 1600-ден астам техника жұмылдырылды. Сөйтіп, коммуналдық қызметтер Астанадан 30 мың текше метрге жуық қар шығарды, бұл 2169 ауыр жүк көлеміне тең.

Қыс мезгілінің басынан бастап қар полигондарына барлығы 154 мың рейс, яғни 2,1 миллион текше метрден астам қар шығарылды.

– 24 сағат бойы екі ауысымда қар тазалауды қарқынды жүргізудеміз. Қыста бір ауысымда мамандандырылған техниканың шығуының жалпы саны 400 бірліктен асады, сондай-ақ қысқы маусымға 540-тан астам жүргізуші мен 390 жол жұмысшысы жұмыс істейді. Қалың қар жауған кезде мердігерлік ұйымдардың 250 бірлік дейін техникасы қосымша жұмысқа тартылады, – деді «Астана Тазалық» мекемесі өндірістік орталықтың бас маманы Ержан Айтмахан.

Сондай-ақ көктайғақтың алдын алу үшін елорда көшелеріне 10,5 мың текше метр құм-тұз қоспасы, 590 тонна көктайғаққа қарсы реагент және 3 мың тонна техникалық тұз себілді.

## КОМПАНИЯЛАР ЛИЦЕНЗИЯСЫНАН АЙЫРЫЛДЫ

Өткен жылы Қалалық орта сапасы және бақылау басқармасы жоспардан тыс тексеру жүргізіп, 288 бұзушылықты анықтап, кемшілікті жоюға 247 нұсқама берді.



Сапасыз құрылыс салғаны және құрылыс-монтаждау жұмысын жүргізгені үшін 46 ұйымға шектеу қойылды. Құрылысты дұрыс бақыламаған 7 техникалық қадағалау ұйымы 6 ай мерзімінде аттестатты тоқтатты және 22 техникалық қадағалау сарапшысы жауапқа тартылды.

Астана қаласының әкімшілік құқық бұзушылық жөніндегі маман-

дандырылған ауданаралық сотының қаулысымен сапасыз құрылыс-монтаждау жұмысын орындаған сегіз компания құрылыс лицензиясынан айырылды. Олар: «NAK development» ЖШС, «БазисДоСтрой» ЖШС, «КСМК-АФ» ЖШС, «ДВК-Engineering» ЖШС, «Пропилон» ЖШС, «ANA Astana» ЖШС, «ППК» жобалау-құрылыс компаниясы» ЖШС, «X-clusive Qurylyus Group» ЖШС.

## ЗЕЙНЕТАҚЫ МӨЛШЕРІ АРТА МА?

1 қаңтардан бастап жаңа арнаулы әлеуметтік төлем енеді және зейнетақы мен жәрдемақы көлемі артады. Бұл туралы Астана қаласының коммуникациялар қызметінде Еңбек және әлеуметтік қорғау комитетінің Астана қаласы бойынша департаментінің басшысы Қанат Тоқтыбаев хабарлады.

Мемлекет басшысы Қасым-Жомарт Тоқаевтың Жолдауына сәйкес 2024 жылдан бастап зиянды жұмыспен айналысатын адамдарға арнайы әлеуметтік төлем енгізілді. Бұл санатқа жататын адамдар 55 жасқа толуы, кемінде 7 жыл міндетті кәсіптік зейнетақы жарнасын төлеуі және зиянды жұмыстан босатылу немесе басқа жеңіл жұмыс түріне көшу шарты сақталуы міндет.

– Жыл басынан жасы және еңбек

сіңірген жылдары үшін зейнетақы төлемінің мөлшері 9 пайызға өсті. Жасына байланысты жаңадан тағайындалған зейнетақы төлемінің мөлшерін есептеу үшін ескерілетін ең жоғары табыс 55 АЕК (203 060 теңге) құрайды, – деді департамент басшысы Қанат Тоқтыбаев.

Спикердің сөзінше, 1 қаңтардан бастап мемлекеттік базалық зейнетақы төлемінің мөлшері Әлеуметтік

Кодексінің 205-бабына сәйкес ең төменгі күнкөріс деңгейінің жаңа мөлшеріне пайыз қатынасы белгіленді. Бұл жаңа тағайындалған зейнеткерлерге және 1 қаңтарға дейін зейнетке шыққандарға да қатысты. Ең төмен базалық зейнетақы 28215 теңгені, ең жоғары 45 578 теңгені құрайды.

Мемлекеттік бюджеттен жүзеге асырылатын әлеуметтік төлемдердің мөлшерін белгілеу үшін Қазақстанда ең төменгі күнкөріс деңгейі (ЕКД) және айлық есептік көрсеткіш (АЕК) қолданылады. Ең төменгі күнкөріс деңгейі мен айлық есептік көрсеткіш мөлшері инфляцияның болжамды деңгейін ескере отырып, жыл сайын белгіленеді. 2024 жылдың 1 қаңтарынан олардың мөлшері 7 пайызға индексацияланды.

## Қытайлық электрліктер көш бастады.

Расында, қытайлық автопром әлемді жаулап жатыр. Әсіресе, электрокар нарығының жетістігі айтарлықтай. Қазір миллиондаған адам бензинмен жүретін автомобильді тастап, электрлі темір тұлпарды тізгіндеуге асығуда. Осы нарықты Қытай игеруге басымдық берді. Былтыр электромобиль өндірісінде монополист саналатын Тесла 484 мыңнан астам көлік құрастырса, Қытайдың «BYD» компаниясы 526 мың темір тұлпарды тұтынушыларға ұсынды.



## Қан қысымын өлшейтін жасанды интеллект пайда болды.

Енді қан қысымыңызды танометрмен емес, бет-әлпетіңіз арқылы өлшеуге болады. Бұл – жапондық ғалымдар ойлап тапқан жаңа жүйе. Ғалымдардың сөзінше, жасанды интеллект арқылы басқарылатын жүйе жүрек соғысын, тыныс алу жиілігін, қан қысымын небәрі 10 секундта тексере алады. Тұрғындар дәрігерге сол үшін арнайы бармай-ақ, үйден тексеруге мүмкіндігі болады.

Жүйе өз алдына бөлек смартфон арқылы жұмыс істейді. Соған кіріп, камераға қарасаңыз болғаны.

## ЫНТЫМАҚТАСТЫҚ ҮРДІСІ

Астанадан Новосібірге әуе қатынасы жаңартылды. 15 қаңтардан бастап Астанадан Новосібірге Qazaq Air әуекомпаниясының ұшақтары ұшады.



Рейстер аптасына 2 рет дүйсенбі және жұма күні жергілікті уақыт бойынша қатынайды (IQ 5005 Астана 20:40 – Новосібір 23:30, IQ 5006 Новосібір 00:30 – Астана 01:20).

Қазақстан мен Ресей арасындағы

әуе қатынасын жаңарту – екі ел арасындағы сауда-экономикалық, туристік және мәдени-іскерлік ынтымақтастықты одан әрі дамытуға ықпал етеді. Соның бір көрінісі – Астана мен Новосібір әуе қатынасының іске қосылуы.



























## ҮНДІСТАНДАҒЫ ӘН КЕШІ

Астана мемлекеттік филармониясының камералық хоры алғаш рет Үндістандағы халықаралық фестивалге қатысты.



Айгүл  
УАИС

Өнер ұжымының көркемдік жетекшісі Гүлмира Құттыбадамованың сөзінше, былтырға дейін оның үнді музыкасымен таныстығы

Радж Капур мен Митхун Чакрабортидің орындауындағы әндермен шектелетін. Алайда бүкіл әлемге танымал композитор, скрипкашы Л.Субраманьяммен кездесіп, ынтымақ орнатуынан кейін оның ойы өзгерген. «Субраманьям музыкасының өзіндік

қасиеті мен ерекшелігі бар. Оның әуендері еркіндікке толы» дейді хордың көркемдік жетекшісі.

Үндістанда өткен Халықаралық Лакшминараяна музыкалық фестивалінде (LGMF) 100-ге жуық музыкант өнер көрсетті. «Үнді музыкасының

құдайы» саналатын Субраманьямның жетекшілігімен классикалық мелодиялардың попуриі шырқалды. Фестивальдің 33 жылдық тарихында тынбай өнер көрсетіп келе жатқан виртуоз скрипкашы музыканың мәдени және тілдік шекаралары жоқ екенін дәлелдеп келеді.

33-фестиваль Times Of India-мен бірігіп ұйымдастырылды. Биылғы фестиваль үнді-қазақ достастығына арналды. Орталық Азиядан барған симфониялық және хор оркестрі 13 қаңтарға дейін Үндістанның Бангалор, Майсору және Мумбай сияқты 4 қаласында өнер көрсетіп келеді. Делидегі кешке елдің Мәдениет министрі Минакши Лекхи, сондай-ақ Қазақстан Республикасының елшілігі өкілігі басшысының орынбасары Дархан Сейтепов қатысты.

Айта кетейік, Қазақстаннан келген хор ансамблі екі ішекті домбыра мен қобыз сияқты аспаптардың сүйемелдеуімен халық әндерін орындады.



## ЖОЛДАМА БЕРЕТІН ЖАРЫС

Дзюдодан Париж Олимпиадасына ұпай үлестіретін соңғы жарыс Астанада өтеді.

ҚР Ұлттық олимпиадалық комитеті мәлім еткендей, Халықаралық дзудо федерациясы (IJF) 2024 жылғы спорт кестесін жаңартты. Нәтижесінде Қазақстанда өтетін әлемдік Qazaqstan Barys Grand Slam 2024 жарысы Алматы қаласына Астана қаласына ауысты. Жарыс 10-12 мамыр күн-

деріне жоспарланған. Айта кетерлігі, бұл бәсеке – 2024 жылғы Париж Олимпиадасына рейтингтік ұпай беретін соңғы Grand Slam жарысы. Grand Slam жарысының жеңімпаздары мен жүлдегерлеріне берілетін ұпайлар: I орын – 1000 ұпай, II орын – 700 ұпай, III орын – 500 ұпай.

## ТАШКЕНТТЕ ШЫҒАТЫН ҚАЗАҚ ГАЗЕТИ

Ташкентте шығатын қазақ тілді «Нұрлы жол» газетінің жарыққа шыға бастағанына 33 жыл толды.

Ғалым  
ҚОЖАБЕКОВ

Көрші елдегі қандастарымыз үшін үзбей ақпарат таратып келе жатқан республикалық басылым Озбекстан Олий мәжілісі мен Үкіметінің қолдауымен шығады. Саяси-әлеуметтік мәселелерден бастап ауыл азаматтарының өмірі жайлы да мақалалар үздіксіз беріліп отыратын газет аптасына екі рет 5 мың таралыммен жарық көреді.

«Достық туы» деген атаумен 1991 жылдың 10 қаңтарында

жарық көрген газеттің алғашқы бірнеше саны Шымкенттегі баспаханада басылған. Арада екі жыл өткенде атауы «Нұрлы жол» деп өзгерген басылым, негізінен, елдің саяси өмірін, әлеуметтің жайын, Озбекстандағы қазақ диаспорасының тыныс-тіршілігін назарда ұстайды.

«Қазақстанмен байланысымыз жақсы. «Отандастар» қоры бойынша көп материал шығады. «Егемен Қазақстан», «Астана ақшамы» газеттерімен шығармашылық байланыс ұстаймыз» дейді Қазақстан



Республикасы Президентінің Алғыс хатымен марапатталған «Нұрлы жол» газетінің бас редакторы Ғұламзәкір Юсупов.

Бүгінгі таңда «Нұрлы жол» газетінде 20-ға жуық қызметкер

еңбек етеді. Олардың қатарында Қазақстанның жоғары оқу орындарында оқыған журналистер де бар. Газет редакциясы Ташкенттің орталығындағы Баспасөз үйінде орналасқан.

## «НОМАД» – ЖЕҢІМПАЗ!

Елордалық «Номад» хоккей клубы шайбалы хоккейден құрлықтық кубок ойындарының жеңімпазы атанды.



Финалдық турнирде «Номад» хоккейшілері алғашқы екі ойында қарсыластарын айқын басымдықпен жеңіп, кубокты жеңіп алуға қажетті ұпай санын алдын ала жинап алды. Олар алдымен «Кардиффті» (5:2), одан кейін «Хернинг Блю Фоксты» (7:2) тізе бүктірді. Осылайша, соңғы айналымның алдында 6 ұпайға ие болды. Ал «Номадтың» негізгі қарсыласы – «Катовице» Уэльстан келген командадан 2:3 есебінен ұтылды. Енді «Номадты» жеңсе де,

6 ұпай жинай алмайды.

«Кардифф» хоккейшілері астаналық командамен ұпай саны жағынан теңесе алады, бірақ «Номад» оларды бір рет жеңген. Осы басымдықтың арқасында «Номад» алға шығып тұр. Осылайша, «Номад» құрлықтық кубокты мерзімінен бұрын жеңіп алды. Олар мұндай жеңіске осымен екінші рет қол жеткізіп отыр.

## НЕ? ҚАЙДА? ҚАШАН?

Еркеғали Рахмадиев атындағы мемлекеттік академиялық филармония шығармашылық ұжымдарының ҚАҢТАР айына РЕПЕРТУАРЫ

19	19:00	«ЗИМНИЕ ГРЕЗЫ» концерті Симфониялық оркестр Филармония кіші залы
26	18:00	«АСТАНА КЕШІ КӨҢІЛДІ» концерті Дәстүрлі әншілер Филармония концерт залы
27	17:00	«VIVAT MAESTRO» концерті Қайролла Жұмакеновті еске алу кеші Үрлемелі оркестр Филармония концерт залы

Филармония концерт залы - Кенесары, 32  
Филармония кіші залы - Абая, 29

ӘЗІРБАЙЖАН МӘМБЕТОВ АТЫНДАҒЫ МЕМЛЕКЕТТІК ДРАМА ЖӘНЕ КОМЕДИЯ ТЕАТРЫ

РЕПЕРТУАР / ҚАҢТАР

17	Кішкентай ханзада /моноспектакль/ Авт. А.Эзюперн   Реж. Н.Мүслимов	Ср 19:00
19	Чарли Чаплин /трагикомедия/ Авт. Н.Балобан   Реж. Н.Балобан	Жм 19:00
21	Ана үмігі /моноспектакль/ Авт. К.Иванович   Реж. У.Каримбаев	Жс 18:00
24	Келіндер көтерілісі /комедия/ Авт. С.Ахмад   Реж. У.Карымбаев	Ср 19:00
30	Ауыл хикаялары /драма/ Авт. О.Бөкеев   Реж. С.Халимов, Э.Бадхмет, Н.Мүслимов	Сс 19:00
31	Ауыл хикаялары-2 /драма/ ПРЕМЬЕРА Авт. О.Бөкеев   Реж. Э.Бадхмет, Н.Мүслимов	Ср 19:00

JASTAK TEATRY

Таптым.Ғашық болдым.Жоғалттым	19:00	20-21 ҚАҢТАР
Ғашықтар	19:00	24 ҚАҢТАР
Ірімшік құмар тышқандар	11:00	25 ҚАҢТАР
Шырақ	19:00	26 ҚАҢТАР
Жанарымдағы жалғыз әуен	19:00	27 ҚАҢТАР